



Stichting Epilepsie Aruba cu lectura informativo tocante malesa di Epilepsia

Un promedio di 10 mil persona ta biba cu Epilepsia na Aruba



ORANJESTAD (AAN): Recientemente a tuma luga un lectura masha interesante organiza door di Stichting Epilepsie Aruba (SEA). Milly Henriquez, Vice Presidente di SEA a duna di conoce cu SEA ta un fundacion lanta na aña 2007 y tur aña ta purba organiza un lectura informativo dos biaha pa aña dirigi na tur esunnan cu ta biba cu epilepsia. Tambe esaki ta un oportunidad pa haya sa cuanto hende cu epilepsia ta biba na Aruba.

El a agrega cu e neurologonan no ta permiti pa publica datonan tocante e situacion di e pashentnan, pero voluntariamente e pashentnan ta acerca e fundacion y duna informacion, el a bisa.

Tin indicacion cu un promedio di 10% di e poblacion ta sufri di epilepsia y esey ta nifica pa Aruba un cantidad di 10 mil persona a presenta un atake di epilepsia den nan bida. Banda di esaki tin entre 3 mil pa 5 mil persona cu ta bay dokter cu ta bisa cu nan por tin epilepsia.

Na Aruba ta manera un berguensa pa hende haya sa cu bo tin epilepsia. "Pero esaki no ta ningun sorto di berguensa, un maleza e ta". Milly Henriquez a subraya.

E anochi di e lectura tabatin dos dokter nobo cu a bin Aruba. Tur dos ta neurologo. Tin Dr. Carla de Caudo kende ta specialisa den epilepsia y su casa Dr. Rafael Gonzalez-Redondo kende tambe a elabora tocante epilepsia pero el a referi na e parti neu-


rologico di un pashent.

Banda di esaki a hiba palabra Andy Gomez cu ta un maestro di Deporte na Colegio EPI cu a elabora riba epilepsia den deporte. E comerciante Carlos Maduro tambe a conta di su experiencia cu epilepsia.

Finalmente, e Vice Presidente di e organizacion a agrega cu SEA ta bezig treceiendo consciencia den nos comunidad pa loke ta epilepsia y temporada di carnaval. Mester conscientisa e pashentnan pa no para hopi

den solo, no bebe mucho alcohol ya cu esaki ta cosnan perhudicial pa un persona cu epilepsia.

Aña pasa SEA a lansa un "Emergency Card" y nan kier pa tur hende cu epilepsia uz'e y pon'e den nan cartera of tas cu nan nomber y di e famianan cu mester worde yama den caso di emergencia. Riba e parti patras tin tur e informacion riba kico mester haci si acaso un persona ta topa cu un pashent hayando un atake epileptico. El a bisa cu



den un caso asina e persona mester keda rustig, pone e pashent abao, na banda y no hinca nada den su boca. Si e atake ta dura mas cu 3 minuut yama ambulance.

Cu tur esaki SEA ta bezig cune. E carchinan ta cla caba. E personanan cu epilepsia por acudi na Stichting Epilepsie

Aruba y lo zorg pa atravez di e specialistanan nobo aki cu ta traha den Hospital e personanan cu epilepsia uza e carchinan aki y cana cune.

Pa cualkier informacion por tuma contacto cu Stichting Epilepsia Aruba via email epilepsiearuba@gmail.com.